



Saammaasseqatigiinnissamut Isumalioqatigiissitat innersuussutaat arfineq marluk naammassiniarlugit suliniummik aallartitsinissaat pillugu Naalakkersuisut peqquneqarnissaannik Inatsisartut aaliangiiffigisassaattut siunnersuut, iliuusissatullu pilersaarut UPA23-imi Inatsisartunut Naalakkersuisunit saqqummiunneqassasoq.

(Inatsisartunut ilaasortaq Doris Jakobsen Jensen, Siumut)

(Siullermeerneqarnera)

Qangalinngorpoq, Saammaasseqatigiinnissamut Isumalioqatigiissitat innersuussutitik tunniimmatigit. Imaassanngilaq, innersuussutit taaku pujoralatsiinnassasut. Innersuussutit ingerlateqqittariaqarpagut isummerlutalu, suut pingaartinneqassanersut imaluunniit tulleriiarneqassanersut.

Taamaattumik Inatsisartunut ilaasortaq Doris Jakobsen Jensen qutsavigerusuppara siunnersuuteqarnermigut ajornartorsiummik taassuminnga uparuummatigit.

Naalakkersuisut ilalernartippat isumassarsiap ingerlateqqinnissaata suliarinissaa allannguutissatullu siunnersuuteqarsimallutik, akuerineqassaguni kinguneqartusaaq, naatsorsuutigisinnaagipput, innersuussutinik suliat sumut killinnerisa suliarineqarnissaat aammalu suleriaqqinnissamut iliuusissatut pilersaarusiornissaq. Demokraatit taakkununga tunngasumik iliuusissatut pilersaarutip atuarnissaa qilanaaraat.

Taamatut oqaaseqarluta Naalakkersuisut allannguutissatut siunnersuutaa akuerisassanngorlugu innersuussutigaarput Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliami suliareqqinneqartussatut innersuussutigaarput.